



**Uunga siunnersuut: Akileraruserinermik ingerlatsineq pillugu Inatsisartut inatsisaata allanngortinnissaa pillugu Inatsisartut inatsisaat (Akileraarusiisarnermi iluarsaaqqinnerup piviusunngortinneqarnera il.il.**  
(Aningaasaqarnermut Akileraartarnermullu Naalakkersuisoq)  
(Siullermeerneqarnera)

Uunga aamma Demokraatit aallaavittut nuannaarutigisorujussuarput, inuit amerlanerit maani nunatsinni pisuunnguallassimmamata. Nuannaarutigaarput, ulluinnarni pisariaqartitanut akissaqarnerulaalersimmamata. Aammalu ukiorpassuarni nilliaatigisimallutigu akileraartarnerup aaqqissuteqqinnissaata pisariaqassusaa. Imaanngilarli, akileraartarnermut aaqqissusseqqineq Naalakkersuisut uani saqqummiussaata hurraartuutigissagipput. Paasinarluinnarporlu, illuatungiliuttuniit partii ataasiinnarluunniit Naalakkersuisut akileraartarnermut aaqqissussaanut atsiorusussuseqarsimanninnerat.

Demokraatit ajornartorsiutinik arlaqartunik takusaqarsinnaavoq akileraartarnermut aaqqissusseqqiinermi pingaarnersiuisimanermut. Tassani pineqartunut ilaapput, kalaallit aningaasaateqarnerulersinnerat aammalu aningaasalersorneqarneranut periusissatut toqqarneqartumut tunngatillugu. Kingullermut tunngatillugu oqartariaqarunaraluarpunga aningaasaliisimanninnerup. Tamanna uterfigeqqissavara.

Akileraarutinik appartitsinernut tunngatillugu, maluginiaqqunarpoq, akileraartarnermut aaqqissusseqqiinermi akileraarutinik appaanivimmik imaqanngimmat. Akileraarutissiinermi procenti taamaattumik allanngunngilaq. Naalakkersuisut ilanngaatik qaffannissaa toqqaannarsimavaat sulinerimullu ilanngaat allanngortiterlugu. Tamanna angusaqarurussusermik takutitsinerunngilluinnarpoq. Taakkununnga marlunnut isumaqataalluta taaserusussinnaagaluarpugut, kalaaleq aningaasaateqarnerulersittussaammassuk. Piumanerugaluaratsigumi, allatut iliuuseqarfigineqarnissaa, aaqqissusseqqineq akileraarutinik appaanivimmik imaqartumik.

Aaqqissusseqqiinermili ajornartorsiuterujussuaq tassaavoq aningaasalersornera minnerunngitsumillu aningaasalersorneqannginnera. Atagu aallartiffeqarlanga aningaasalersorneqarneralu aallarniutigalugu.

Siullermik taakkuninnga 85 millioner koruuninik aningaasalersuineq ilaatigut Naalakkersuisut innuttaasut kaasarfianniit aassallugit qinersimavaat annertuumik akinik qaffaanermikkut soorlu sodavandinut juicenullu. Kaasarfimmik kaasarfimmik allamut nuussinerinnaavoq, isumaqarpianngitsoq.

Aappasaatut Naalakkersuisut qinersimavaat suliffeqarnermi akitsuutip procentpointimik ataatsimik qaffanniarlugu. Tamanna 127 million koruunit ataatilaarlugit aningaasaleeqataassutigineqassaaq. Aningaasaliissutini taanna akornutaasorujussuuvoq pingaartumik nunatsinni tamarmi innuussutissarsiorlutik ingerlataqartunut minnerusunut, qularnanngilluinnartumillu kingunerissallugu, namminersortutut ingerlataqarnerup akisunerulerlunilu ajornakusoornarlerneranik. Ingerlavik



ajorluinnarpoq. Ataqqittumik killormut ingerlasussaagalarpoq qulakkeerlugulu, namminersortutut suliffiuteqarnerup akikinnerulerlunilu ajornakusuunnginnerunissaa.

Aningaasaliissutit taakku saniatigut arlaatigut akornutaallutillu aningaasatigut ajoqutaassapput innuttaasunut aammalu suliffeqarfinnut, taava aningaasaliilaassaagut ilanngaatit ilai atorunnaarsillugit paasiuminaatsumillu pisortat ingerlataasa atorluarnerunissaat pillugu oqalulluni.

Aningaasaliinerilli uani taakkartorneqartut naammaqqajangillat aaqqissuusseqqiinerup aningaasalersornissaanut. Uanilu tikippara, aningaasaliisimannginneq. Naalackersuisummi aningaasanik amerlanernik nassaarniarnissartik taamaatiinnarsimavaat. Akerlianilli toqqarsimallugu sinneqartoorutinit atuinissaq neriutugalugu, ukiuni tulluuttuni aamma annertuunik sinneqartooruteqarnissaq atugassaminnik. Sallaatsumik oqassagaanni suleriuserineqartoq assut qularnarpot. Meeqqatta ernuttattalu akiligassamik akilerneqarsimanngitsumik qimatsivigineqarnissaat ilimanaatilerujussuuvoq. Uagullu Demokraatini isumaqarpugut, toqqaannartumik akisussaassuseqannginnerusoq akiligassap kingulissatsinnut akiligassanngortinnissaa. Naalackersuisut, IA aamma Siumut innuttaasunut namminneq tunissutiminnut akissaqartariaqaralarput, ajoraluartumilli eqqortoq unaavoq, sapiissuseqanngillat qinersinissaq taama qanillisitillugu. Tunissuteqarusupput, akilerumangilaalli. Kikkunnut tamanut ersarippoq, taamatut politikkimik ingerlatsineq ajortuusoq.

Neriuppugut, Naalackersuisut, IA aamma Siumut ataatsimiititaliani sulinermini isumataartinneqassasut akileraartarnermullu aaqqissuusamminnut aningaasaliissutinik eqqortunik saqqummiussillutik. Allat tamaasa akuerineqarsinnaanngitsutut isigissaagut qinersisartunullu peqquserlunnertut isigissallutigu.

Siunnersuut taamatut oqaaseqaaserlugu Aningaasaqarnermut- aamma Akileraartarnermut ataatsimiititaliami suliareqqitassatut innersuunneqarpoq.